

四庫全書

集部

欽定四庫全書

文定集卷十四

宋 汪應辰 撰

書

與周參政

奔走州縣竊見百姓之凋敝官司之匱乏未有甚于今日者也誅求督迫方且源源而下其勢不能復堪將有未易言者近戶部行下以今歲下半年賦限七月內令

以其他名色先次兌那起發一半此誠國用窘急有不得已者今州郡數米而炊朝不謀夕豈復有贏餘以相通乎如去年大赦空給所在紛紛有執持郡守有毆繫曹掾者若州郡麤有餘積肯使之至此今迫于期會州既無有必責之縣縣必責之百姓不過科率以取足而貪殘者又夤緣以濟其姦竊謂此本是戶部合得財賦其遲速止數月之間而百姓利害便有死生禍福之分敢望參政校量得失之多寡力救此事以蘇民力所以

消患于未形者非小補也昔漢高祖征伐于外而蕭何
鎮撫百姓給餽餉于內孫權與周瑜謀拒曹操而曰已
選三萬人船糧戰具都辦自古用兵未有本不先固而
望得于僥倖食不先備而責辦于倉猝者仰恃知照之
厚僭易及此知罪

又

自上饒登州歷四月餘始抵萬州去成都尚一千二百
里艱險萬狀幸而無他已于閏月十五日境上交印俟

到成都別具啓狀敵情無厭仰貽宵旰之慮詔旨屢下
孰不感動西和州兩捷敵即引遁似聞京西亦然要皆
非大軍雖或間有出沒諸將捍禦甚嚴可以無患第不
知淮上如何竊見前此用兵朝廷與諸將意向情狀初
不相通各行其志是以每相牴牾經畫西事令邊臣具
攻守二策而稟命于上此其類也所謂不從中覆者蓋
臨機應變難以遙制若乃攻守大計豈當初無定論乎
至于說者不一未免有利害之私勇怯之異惟平心虛

已無所係累顧望者乃可以灼見實理而斷之以至當
此中外所望于門下也疎拙無取誤蒙委寄之重事之
所當料理者非一尚湏續具陳稟萬里之外所恃者參
政知照素厚庶幾得伸其區區耳若坐視病敝拘文韋
俗苟且歲月為自營計則可恐非朝廷所以使令之意
也王之奇者才行俱備頃京西制置司差權光化軍措
畫備禦數月間井井有條理已具奏乞以準備差遣處
之伏望鈞慈特從所請

與吏部陳侍郎

朱元晦在建安相遇問學材識足為遠器亦招其來此
帥司准備差遣傅鉛者信州人沿檄歸鄉不復為來此
計近相見云明年正月即乞休致蓋其家富厚明年即
七十也傅雖差下替人輒欲俟其投下文字作非次闕
申乞辟差元晦敢望同凌丈見宰執言之如許得的確
方敢申上也與宰執書亦云其詳託吏部兩侍郎矣切
乞留念仍示報曲折幸甚王龜齡胡邦衡劉賓之相繼

造朝當有卓絕切至之論也

又

某乃者拜狀伏蒙鈞慈賜以答報感荷無量示諭悉已
遵稟朱廸功熹進修日新殊未可量也不知朝廷有以
處之否呂奉議大倫貧甚間廢之久士論惜之如主筦
財用若期月之闕亦可待也此外如郡倅近闕無不可
者敢望鈞慈特賜矜念前此鼎州甚得士民之譽凌侍
郎能言之併乞垂察

與宰執

比者輒具啓狀候問門下庶幾下情得以上達歲晚寒冽恭惟論道餘暇天神交相釣候動止萬福仰恃平日蒙被知遇之厚敢以私懇冒瀆鈞聽某家世農業其為生之具甚微類皆耕而後食織而後衣者也一鄉之內版籍所載未嘗有以官為戶者至某始得一官其區區之心非特以仰事俯育而已兄弟宗族若內若外所欲以相收相恤者非一皆其義所當為者而某自從仕來

其間居者至于十餘年其遠適者至于二三千里間者出守婺州才數月爾藥傷補敗百未一二而大禍仍之屏伏墳墓艱窘萬狀支綴喘息僅至今日大抵二五年間所望以相收相恤者其貧者日以困壯者日以老者往往物故僅有存者每念至此若鍼刺之在肺腑重以逋責之未解而有過時之負婚嫁之未辦而有不及時之憂此皆寢食所不遑安者如蒙鈞慈裁賜一外任合入差遣使得謹勉職事上以補報萬一而下以遂

其私計之如前所陳者不勝幸願昔唐杜牧以私計迫
蹙求為刺史以為甚于陞井者求出執熱者願濯且其
言曰為刺史則一家骨肉四處皆泰為京官則四處皆
困某事勢正亦類此干犯威重無任惶懼俟命之至

與趙總領

竊聞調夫饋餉恐或漸及內郡想亦非得已者不知近
日邊報如何敵人有通和之意理自可信但須待朝廷
議定爾若免調發幸甚使司必知其詳敢望示報近有

論此事者謹錄其要切之語上呈恐或有可取也鬻爵
今四年前此使司約束不得抑勒科敷今州縣乃欲一
旦趣辦官吏曉事者少散遣弓手雜職輩徧滿村落凡
稍有生業者例皆逮繫重以箠楚未必有所濟徒為胥
吏輩膏澤之地耳累有來投牒者皆未敢盡行或謂若
請于朝易以度牒則不待科敷而可辦不過遲數日耳
未知使司利害如何頃在福唐嘗乞以所降將仕郎綾
紙易牒朝廷不惜也偶有所見不敢自外率易言之尚

冀台照

又

比者輒以傳聞臆度之言轉達台聽孔子所謂道聽塗說與夫未見顏色而言者蓋方寸怵迫不暇顧慮且恃盛德雅量憂民之憂必有以照其不得已也伏辱誨翰委曲開諭豈勝悚荷蜀道運糧自古難之以漢武帝之威令而發巴蜀萬人轉粟民至驚恐逃亡以諸葛武侯之才畧閉關息民訓農積粟治斜谷卽閣作木牛流馬

可謂謀無遺譖矣然每出師輒有乏絕之患亦可見也
今幸敵騎引退民得休息至于長慮郤顧為經久之計
此誠不可忽者第反復思之諸葛武侯軍所從出先有
定計然後移粟以就之然猶不能善其後今乃因敵應
變其來不測而欲多方以備之其難愈甚矣實未知所
所以為策也

與張魏公

違去門下積有年所拳拳此心惟是與天下之人朝夕

瞻仰方時艱難大旱之霖雨未足以喻伏承詔書起鎮
建康朝野交慶宗社增重恭惟下車開府百神扶相鈞
候萬福大駕巡幸相公去國之久愛君之切今茲進見
之際誠意感動精神聚會厥孚交如所以開天下之福
實在于此會逢其適殆有不偶然者伏乞順時倍保鈞
重以對揚休命主上聖德日新今者僕射相公從容啟
沃但言聽計從有以仰答天意則陟降左右孰非機會
不勝區區仰望門下之誠敢此布稟心之精微蓋有言

不可及者伏乞鈞察

又

僕射相公居守筦鑰而朝廷隱然增九鼎之重方衆情
危疑疫癘繼作鎮撫綏靖中外蒙益茲者主上顧憂兩
淮付以經畫詔旨一下輿論交慶伏蒙垂諭敵人曲折
仰見憂時憫世之志如周公之夜以繼日坐以待旦也
竊謂方今國用空虛百姓窮困將無功而已驕兵未戰
而已敝正當恐懼修省以內修政事之時誠能果斷力

行積累其政則期月三年之效固亦未晚今者相公節制江淮外治舉矣仰惟威譽德望足以振士氣安人心其于更革宿弊興建奇策人既信服事半功倍庶幾愛養根本保固藩籬卓然有不可勝之備天下幸甚惟是任事之難自古所歎如種蠡蕭曹表裏相應然後無一可恨至于進取之舉又湏量力相時見可而動乃能仰承天意昔者相公當國淮西叛兵蓋亦淺事舉朝譙譁前功盡廢蓋旣未信而又莫助也今日居外尤非昔比

事體勢力又不同矣諸葛武侯所論六事大槩謂兵不可不用而成敗則不可必意恐不察者以舉事一不當而輕沮大計故丁寧委曲以曉譬之以武侯得政之專而念慮及此蓋多懼矣頃讀蜀史竊有此論今蒙相公指示故敢忘其僭易輒復上稟未知淺陋之見果能得古人之意否竊祿無補求去未獲而諸公以戶部繁劇猥使承乏材力短拙朝夕愧恐惟民勞財匱與所以致弊之由不敢不為聖主言之他未知計之所出也相公

矜念致厚有以教督其愚甚幸未即前侍伏乞倍保清
重對揚休命以為宗社之慶

又

仰惟僕射相公以盛德碩望鎮撫內外民心既安士氣
復振天下幸甚至于克勤小物夜以繼日竊謂宜有所
減省以怡神養壽此非獨門下士之私情也敵人變態
不常相公長慮遠畫出于萬全方且厚固吾圉為不可
勝之備或傳諸將頗欲乘間伺便時有侵略竊恐無益

于今日之大計不足為也東晉之末微弱甚矣猶能近
取兗青司豫之地然而果何益哉傳聞之言亦未必然
相公必有以裁之特恐萬一有之故僭易上稟伏乞鈞
照

又

迺者都下參候蒙與進之意益厚惟綿薄學力不彊無
能仰稱萬一至于內自愧恐而求所以稱者不敢以頃
刻怠也八月之初得請去國奔走道路十月末始到福

唐苟無疾苦皆庇貺所及相公去此雖久而斯民愛慕
未嘗少替惟相公所以致此者敢不鼂勉求之以無負
平日教誨之重更望時賜警策使得奉以周旋也無由
前侍伏乞倍護風采對揚休命以為宗社之慶

與張敬夫

伏承僕射相公再正台席宗社之福中外交慶昔呂正
獻當國伊川先生以為原明之助為多此亦今日善類
所望于敬夫也輒有一事雖已稟知丞相尚有未盡廣

西之寇久未平定蓋所以致寇者非一也說者以為百姓凋弊日甚而官吏貪殘無已連年荒歉餓殍滿路而州縣不肯檢放租稅官兵俸給數月不支而歲守監司爭獻羨餘其他政事大抵類此百姓磬罄無所控訴以為良民則坐而待死為賊則生此民之所以從賊也屠將官高居弁執郡守劉長福破高雷化三州此其顯然可見者而我之所遣既非良將又非精兵糧又不給官司行移賊皆前知而我初不知賊之動息賊酣飲酒肉

而官軍嘗有饑色所以每出輒敗至于死事之後無銖
兩之報人皆以為戰則死退則生此官之所以不能制
賊也傳聞之言如此未知朝廷所聞如何或謂州縣兵
將更相蒙蔽帥守監司未必盡知一路之詳其所知者
又不盡以告于朝廷也今若不究其病弊更張而一洗
之則其患豈特如前而已哉近除何直閣知靜江自此
遠方利害之實必能盡以告于朝廷矣何帥之意欲乞
朝廷差官兵三千人仍領將官之可委者蓋欲示以聲

勢使賊有所畏庶幾可以撫定又須應副錢糧如度牒
官告之類無窮也廣西見闕一漕若得鍾世明為之可
以協濟又湏明降指揮以寇盜未息促其之官非獨得
免稽滯又足示中外以用之之意也帥司舊有參議官
近年不除欲得新知峽州呂令問為之若朝廷徑除固
幸不然當有所請矣望一一稟知丞相也昔儂智高叛
初遣楊畋曹修再遣孫沔余靖皆無功至狄青出乃克
人皆以為討賊非書生事而劉原父獨以為前此諸人

皆有所牽制及青之出僚屬得自辟除官吏得自廢置財賦得自移用將士得自誅賞此其所以成功也況今日事體種種皆非昔比若朝廷不留意假借責任則雖有能者亦無所施其巧矣

與漢州張知郡

伏蒙頒示先天之書探索隱奧會歸于一見所未見幸甚不可言昔之學者或流于術數或溺于虛無此書之傳使人知聖人之道皆吾性分日用之事其所以覺後

覺多矣且聞吏牘滿前高明洞照竅竄立解莫不中者
蓋法如是故非彊為也所治者大當又有不可量者矣
頃蒙示諭殊荷忠告之意凡蜀中事之稍大者皆已縷
悉具奏尚未見行下邊上似稍寧息近聞金使來聘也
諸有可以振其不逮願聞之

與待制張提宮舍人

承乏如昨第居民頗苦疾疫竭力救療幸亦少定渠流
通快勝于去年農事可以及時也忽得金字牌令制置

司抽差四路廂禁軍二千五百人與吳侯正兵相兼使
喚可以免差募篙梢之擾回奏已條陳其不可未知有
能益否要之諸公一切受成而議論雜出一東一西但
只民被其害無時而已耳家兄在諫省僅月餘乞出得
江西漕今當到官矣林安宅大諫王伯庠副端告詞有
若乃矯激以沽名輕躁以觸機使聽者難于從違非國
家之福之語蓋有所指也林王業皆求去會懷自度支
郎中除權戶侍其他縷縷非紙上可完元章未聞來期

龜齡書云欲力請奉祠未知能如意否

與王宰

比因還介草率上狀茲者淳辱書誨不勝慰荷仲夏暑
雨恭惟王事多暇明神叶相尊候萬福竊祿無補日以
愧懼不足為故人道也武陵官況當益有可樂凌文舍
人遽易地未知後來如何示諭敢不在念第諸公皆非
相識俟有可告語者謹一不忘也其他委令亦幸勿外
困于人事無少暇隙姑此布敘殊不逮意惟冀順時保

重前迂休寵

與呂逢吉

呂與叔中庸解聖人有所不知聖人有所不能乃云用
者顯著而易知不用者微密而難知此謂費而隱易知
者易能難知者難能蓋易知易能者常道也難知難能
者至道也知音者瞽矇之所及知味者饗人之所及及
其至也雖以聖人之知音知味不如師曠易牙之精此
聖人有所不知也如此乃是師曠易牙能造乎至道而

聖人反不如也見孺子入井皆有怵惕之心呼蹴而與之行道之人皆不屑及其至也充不忍人之心充無受爾汝之實則博施濟衆堯舜猶病君子之道四孔子自謂未能此聖人有所不能也聖人有所不知語小者也有所不能語大者也引證之意與前有所不知之說兩不相干中庸之說一也前以為語小後以為語大不知何所見而云此一章灼然可疑不知與叔何故乃如此說未知左右本亦然否既云易知者易能難知者難能

則易知者即易能之事難知者即難能之事又豈當以
知為小以能為大乎竊恐非與叔之言也

又

婺卒至伏領賜墨存拊勤勤伏讀再三仰頤至意蓋不知應辰之不可教將期之使勉焉于斯道者也內省涼薄不可大受徒知感服而已惟其平日所聞于師與夫今日茫茫歧路未知適從者敢因是取正于門下伏惟幸察昔人嘗謂能碎千金之璧或失聲于破釜能搏猛

虎或變色于蜂蠻蓋未聞道之心照物不澈是以若是
不一也士方平時勉強為善何所不可至于事有出吾
念慮之所不及者其不失聲而變色幾希矣每念至此
若芒刺之在胸臆間居常惴惴栗栗猶救過之不給況
敢語其他耶頃嘗以是請問子韶先生先生曰學莫先
乎致知古之正心誠意修身齊家治國以明明德于天
下則本于格物自充實之美輝光之大大而化之以至
于聖而不可知則本于有諸已之信存其心養其性以

事天則本于知性誠其身以悅乎親以信乎友以獲乎上而治其民則本于明善且不知知之亦何以行之哉世所謂善從而善之從而行之雖能終其身焉謂之彊學力行則有之而非道也是故好學近乎知而非知也力行近乎仁而非仁也知恥近乎勇而非勇也三者固善矣然使其行矣而不察習矣而不著由之而不知其道則亦衆人耳惟即吾所學所履而求之而後知夫仁之為仁知之為知勇之為勇則知所以修身所以治

人所以事天矣然而孟子曰勿忘也勿助長也忘焉者
是不知道之可求忽焉而不知省也助長焉者是急于
求道而陷于私意也一有私意與道二矣是故私意之
患與忘道同汝輩于求道之際宜以自儆也信師之說
循而求之二年于今所恨雖有此志未能顛沛造次必
于是也不知何以免二者之病得一意于斯道乎夫勿
忘是也欲勿忘也而求之常近于助長二者之間將何
以處之宮使舍人誤相期待有意篤之使有成雖知不

稱不敢不勉願推日用之餘明賜指示以開未悟請得以從事焉因蒙遠實獨學寡聞古人以為懼況于應辰乎瞻望席下以日為歲急于有聞不暇面見而請焉吐露本末不覺忉忉仰溷台聽豈勝悚悚

慰魏邦傑

某頓首再拜恭以先丈承事襟抱疏闊不以膜外易所以自樂者天既畀之賢子矣況平時飲啖步武往往少年所不能及謂且百年以享榮養以為世之修德者勸

豈意遽止于此聞者皆為之驚嘆而交游聞之重以痛惜而不能已也伏惟孝心純至當此荼毒攀慕哭踊何以堪勝奈何奈何先文之令德而有邦傑之賢以為之子有呂文名德之重而實為之計其墓此三者皆足以不朽矣更冀痛自節抑思夫往者之所以不朽在我也不以無益而傷生此實朋游之至望初聞欲歸葬于常山意得面慰繼聞俯徇邦人戀戀之情遂輟初議日念以尺書道區區雖每與侍郎通問不敢以此等事煩

之恐其有所忌諱他又無便遂至今日殊用愧悚錢五千陌漫致奠儀菲薄之甚併冀垂察此聞已遂襄奉不知得地何所吉人所歸宜不偶然寓居復在何地區區不勝懷念呂舍人文遽棄斯世豈勝云亡之痛想左右雖在哀疚中其悲悼之情亦有不能已者已就信州城北十里卜塋諸孤謀往婺州依其二叔父不知曾通問否先丈埋銘乃其絕筆矣儻已刻成因便願求一本且恕干昧也忽遽具疏不盡萬一

文定集卷十四

欽定四庫全書

文定集卷十五

宋 汪應辰 撰

書

與朱元晦

近建安附示手誨慰荷無量當暑恭惟尊候萬福某碌
碌于此日益愧負思見君子且謀所以當如何者此心
往來如飢如渴近事復益可慮雖在疏遠豈能弭忘張

真甫為德不竟然此君實有區區之心孔子稱管仲有仁之功若真甫之功實近之示諭當以為戒誠是也羅文語錄得之甚幸尚有可疑者謹具別紙他日龜山集刻板併以諸家語錄附之不必送延平也羅文語錄中
有可疑者不居其聖與得無所得形色天性與色即是空恐難作一類語看有事君人者一章頃嘗問王文信伯有次第否王文云前兩句有次第後兩句難分又問同是一章若如此說則語脈不貫穿王文云恐如信善

美須有次第至于大也聖也神也豈可分優劣正與事

君人者一章相似神廟時富公嘗薦荆公為翰林學士

韓魏公不聽按神廟時韓富未嘗同朝也

韓魏公罷相
荆公乃召

荆公曰絳之相非維意

熙寧七年韓子華再相
相八年荆公再相

謝為人誠

實但聰悟不及先生

常見胡明仲說明道以上蔡太
傅敏常抑之玩物喪志之類

驩

兜共工事

驩兜薦共工事偶見于堯典崇山之放
恐未必為薦共工也荆公正如此說

道不

足以任之故有典典不足以治之故有刑

此語如

不屈于

法度之威

此恐未足
以言辭

煮海之事誠非獲已令益寬所入

益微然更當思所以救之折張之政固為未遠然今日事勢豈可同年而語自葉左丞作帥盡以郡中財賦之餘獻諸朝今為歲額而帥司諸色糜費昔取之郡者皆帥司自辦又立定寺院納官之額蓋不如此則不能有餘以為獻也既而拘定寬剝錢鍾世明所為寺院益以窮蹙所立之額又不能如數矣而朝廷發下養老軍員揀汰使臣軍員動以十百皆昔所無者近年以來方有事于征討召募調發敷買打造之類符移日至殆不勝其應

接也若窮而不變未知竟如何耳

又

某所欲言者甚多初謂秋涼或可再得承教今遂未可
卜也殊以悵仰諫省二公論龍大淵曾覲未報間却各
除知閣仍兼舊職金給事周舍人相繼論其不可中批
語甚峻二人皆待罪有旨無罪可待劉諫除工侍而張
真甫以待制知會稽真甫陳義甚力引富韓公司馬溫
公辭副樞事未知能必行其志否郎官李君樸林栗緣

禁中點檢小使臣升陟狀而二人所薦乃雜流批出詰
問既而各展磨勘蓋上于細務一一省覽如此也

又

見報有旨引見而未報登對之日竊計誠心正論從容
獻納所以開寤上意者多矣信來倘得聞一二良幸李
慮中先生十月半間見訪館于眉壽堂方說話間忽覺
欲仆急扶之間其無所苦否則曰無事無事尋即不省
人事舁之就榻則已蛻矣後事皆親為料理似可無悔

建安簿已扶護歸鄉想聞之必增惻楚也

又

蒙以延平先生銘文見屬自顧不腆何足以發明道學
之懿所幸元晦論次皆已詳備庶幾有所證爾福唐久
旱奔走祈請殊未霑足朝夕凜凜不知所措奈何奈何
有以教督良幸魏公再往淮上其意必有不可得而聞
者第合堂同席一東一西不知如此做得否令人念念
不已竊聞元晦他日必再到延平倘因而下顧莫大之

幸

又

見許下顧朝夕以冀下旬即遣人往也溫公答明道帖
論橫渠謚事欲附見于龜山集中切望錄示魏公與水
軍統制魏尚復官言者以為不可乃止遺王錢兩侍郎
撫諭兩淮仍措置他無所聞

又

兵級共七人謹遣聽使令自此數日以待來臨王龍二

使還自盱眙力言淮上無備士心不固所以遣宣諭更
戍兵又督府方治淮東總領司事而洪總領入對復言
督府之失所以令總領每半歲或一歲入奏魏公必以
罪去但未知輕重如何耳

又

某舟行至安仁而聞魏公八月二十八日薨背于餘干
雖道路之人亦相與咨嗟痛惜也前者之約孰謂事乃
至此耶

又

某到闕下留旬日兩得入對第訓諭所及責任甚重殊未知所稱塞耳元晦奉祠之請亦嘗言之丞相問甚詳其意甚遲疑且云如此是棄賢也張建安之行初者堂白皆欣然許可適有減罷員關指揮諸公以令行之初殊難之遂已此外有幹辦公事兩闕見任人皆堂除臨行乞從本司辟差亦既得請但闕在一年之後又未知肯俯就否行止非人所能良以自嘆也敵遣使請和朝

廷亦欲報之聞海泗皆已撤戍矣自此湏稍休息但未知何以善後耳陳丞相判紹興比弋陽相見足疾如故若出則湏過關也

又

伏蒙示諭一字之失仰見忠告之嚴誠當如此也伊川于濂溪若止云少年嘗從學則無害矣康節之學豈敢輕議所以舉和靖者正欲明從遊兩字太重耳東坡初年力闢禪學如鹽官縣安國寺大悲閣記省記不分明

其中引日知其所亡月無忘其所能之類其後讀釋氏書見其汗漫而無極從文關西等遊又見其辯博不可屈服也始悔其少作于是凡釋氏之說盡欲以智慮億度以文字解說如論成佛難易而引孟子仁義不可勝用子由又有傳燈錄解見集
中而子由晚作老子解乃欲

和會三家為一此蓋氣習之弊竊以為無邪心謂其不知道也君欲指其失以示人則如某事某說明其不然可也若槩而言之以與王氏同貶恐或太甚論法者

必原其情願更察之也

又

別德寢久邈在天末無復講習之益豈勝勤仰去秋上
狀并納所寫李先生墓誌不知已到否春氣清和恭惟
尊候萬福便中再辱書誨良以慰荷示諭蘇氏之學疵
病非一然今世人誦習但取其文章之妙而已初不于
此求道也則其舛謬牴牾似可置之濂溪先生高明純
正然謂二程受學恐未能盡范文正公一見橫渠竒之

授以中庸謂橫渠學文正則不可也更乞裁酌李先生
墓誌寫得甚草草其間有謬誤處請徑為改正也論語
集解序益簡當所恨不見全書耳蜀士甚盛大率以三
蘇為師亦止是學其文章步驟至於窮今攷古之學則
往往闇略未知究竟如何橫渠先生之曾孫流落在蜀
有橫渠語錄前所未見又文集亦多于私家所傳者俟
有的便納去幸為審訂也

又

某承乏無補重以目疾廢事丐祠未獲當再請也種種
非紙上可究應求秉政足為治表未知其得伸志否僻
遠如坐井底報狀大率兩月餘方到惓惓此心終有不
能已者查元章明敏時得相見稍慰寥落此外惟王龜
齡張真甫通問爾某拜問尊夫人壽履康寧以次眷集
均福有所委令願聞之邵康節子孫大抵不取二程益
私意也邵公濟作聞見後錄有一段謾錄呈不知果是
伊川有此帖否又伊川集中論殺薄昭事元晦以為何

如

又

丞相云嘗作書相招又以堂帖促行蓋自得上已手帖
後寂無嗣音不知君子之行止如何朝夕勤仰夏暑雨
恭惟德履禔福元晦當一來似無可疑若既到之後或
有未安又在我矣要之自處既盡然後可無愧于道也
願以此道為準不必過為疑慮某疎拙最無補猶覬未
罪去間或得瞻見于此以展發所欲言耳

又

某奉祠如昨第目昏殊甚稍勞勸即或全無所見也又
徧身疥癩坐卧不安疾病如此未始寧息而離羣索居
了無進修之益朝夕愧懼西銘通書兩書當置之座右
以求所未至竊謂體用一原顯微無間東西二銘所以
相為表裏而頃來諸公皆不及東銘何也前蒙示諭于
平易處蹉過益見體道之功久而日親道無遠近高卑
之異但見有不同爾然方其未至也雖欲便造平易而

其勢有未能者曾子聞一以貫之之說因門人之間而
曰忠恕而已矣蓋其見得明白行得純熟如飢食渴飲
非有奇異也每念此事非億度言語所能及尚幸時有
以警發其愚陋也陳明仲篤志為善甚不易得其當官
諸事想能書中詳言之但可嘆惜爾

又

某屏居如故第目昏益甚亦良苦也許寄楊文靖胡文
定帖甚幸朱公掞帖見令摹本別寄納伊川先生文字

亦逐旋據檢到者送伯恭矣婺州所刊橫渠集近方見
之前此所得本亦寄他處忌日之變見呂和叔集蓋必
傳之橫渠也塵史所謂者更看伯恭報如何敬夫正月
間一病甚殆今雖良愈尤當加意調護要湏止酒乃善
也

又

某兀坐荒山惟日仰瞻奉八月二十八日賜教慰荷無
量冬寒叅惟進修有相尊候禔福某諸僅如昨雖此間

居略無進道之益每切悚懼思見君子尤不能已也太極說既欲指示人豈免剖析然其理則一而已矣無可疑者上蔡所學精到文詞又足以發之每服膺焉來教所諭誠然此學之所以不可已也竊承有修言二書甚渴見也易傳後敘傳易堂記俟更檢討別拜聞次陳明仲家事初不知聞當作書報之也

與黃岡人

比因還介上狀當即呈達今因妻兄專詣門下復附此

紙此間哀苦窮愁寥落之狀可問而知不重說也內外食口亦四十人因讀信天緣堂記所謂世間寧有一門同日困于無飯者天之所賦自應不闕先生之言端不我欺既以自解復借之以止兒啼而解客嘲也無由瞻見惟乞倍萬珍重即還禁塗以慰上論不次

與呂叔潛

某承乏如故第冬春久旱奔走祈請終未見效不勝悚恐也魏公再相雖出獨斷不知能行其志否種種似未

免俯就雖古人有之亦已難矣兩月之間竝未見其施設必有所甚重者徒令善類嘆息瞻仰而已季文竟去亦失于見幾不早爾舍人恩澤事僅得季文書魏公欣然以為當還切湏及時料理也伯恭今安在兩日前作書託韓無咎附便亦只是報此朱元晦到此一月而歸其學問精進所養益厚所謂日新而未見其止也恐欲知故及之妻弟與尤延之皆欲來此久未聞近音

與喻玉泉

玉泉在漸

前所說王晉老大夫不待按脈而知人病者近得延平
守相見論病甚有理蘄州黃梅村中有周先生者異人
也江州祁居之尹和靖之高第嘗患鼻中時有碎骨出
周云乃飲甘棠湖水所中以生薑為末服及一秤則此
病自愈已而果然問之云水有屍氣觸其骨飲此水為
氣所薰鼻先聞之所以有此病惟生薑性烈可以入鼻
久之乃能蕩滌諸穢所以能愈也其他異事甚多更無
取于人王晉老亦稱之遠方乃有此人豈易得哉辟親

之事恐未湏忙前日見二公郤忘記說鄰人聞人刪定其子為張晉彥婿云晉彥留之他日欲送安國往成親也向說沈洵者今亦為晉彥婿矣

與張真甫

某承乏無補日懷愧悚仰望超然遠引之舉如樊籠之美雲霄也馬船事前奏尚未下既而騷然煩擾益悔所論之不切此復再論副本謹錄呈聖人所謂汝弗能救與是誰之過者其敢逃罪也耶李竑新州編管虞參政

知建康王瞰春官直學士院程叔達丁憂塗中想亦自見報也

與何運使

論語集解得以細覽不專已見不尚文飾而惟其義理之當尤以嘆仰頃承諭及文中子嘗見司馬溫公行狀言有文中子補傳一卷北方得之謹以錄呈其所去取大槩略盡矣此外如云楊素李德林見之類尤為可笑論語于三家必云季康子孟懿子之類必稱孔子對曰

蓋貴貴尊賢其義一也安有身為布衣而于當時之執政而曰素與吾言德林與吾言云云耶

與陳樞密

某疎拙無取謬當閫寄之重曠日持久寂無報効疾病侵凌愈難鼴勉恐仇讐聚理必顛隣力丐奉祠未蒙矜察仰惟樞密知院知照素厚倘得借以餘論使其得免于罪戾遂其分願而去亦所以為國計也幸甚幸甚廟堂登用正臣中外拭目以觀舉直錯枉之政然右府之

事亦固有未易為者竊謂如劉賓之襲釋之劉子駒縱未還朝豈宜久置閒散朱元晦直諒多聞然已除武學博士今若更除都下一差遣其人必有以報補知遇裨贊盛德馮圓仲之家貧困特甚若得復官致仕庶幾不絕祿食猶可存活此皆善類所望于門下者前所稟任俊臣已蒙朝廷除知涪州矣蓋良吏也

又

遞中伏蒙枉賜誨翰仰見存眷之厚至于詢訪時事委

曲周密又見所以任重慮遠之意此不獨某所當拜而
賀也天下幸甚蜀中人才有張行成者頃嘗薦之蒙召
對除郎中兩月引去今知潼州府其學博而尤邃于易
其才高而尤長于理財賦毅然有捐軀徇國之志惜乎
朝廷用之不盡也然其人老矣不能復遠出若就四川
有重難職事付之必能稱辦又有左朝散郎前潼川府
路轉運判官李燾某近嘗以其問學行義具稟必已仰
徹鈞聽如此人者非獨蜀人未易多得也蜀中監司郡

守關員除已奏聞外如張待制震正是精力強明之時
而退就閒地殊為可惜又有左朝請大夫郭印老成詳
練恬靜有守士論所推重雖年垂八十而精力不衰尚
可用也財用不足今日之大患竊見朝廷命令更易不
常暗所耗失自不為少只以四川論之如乾道元年令
宣撫司差兵五千于郢州防秋到未數日又復發回原
所調發往來津遣犒設沿途供億之費不知幾何矣又
于總領所取鐵錢百萬貫欲應副兩淮先發十七萬船

脚之費居其大半尋即罷之近日令制置司抄造錢引紙工料之直約二十三萬貫有奇起綱廩費在外今又以無用令罷矣推此類言之若審于出令亦節用愛人之一端也民力困竭矣而建言者每為掊克之請州縣匱乏矣而當官者競為羨餘之獻皆非治世美事孰若治其本而末自應乎自古南北分爭事變非一未聞北人浮海用兵者惟金人獨出于此亦是多為岐路以困吾師益彼視民如土芥初不計其失亡也使其無膠西

之敗遂能深入亦送死耳凡海船之來必候潮然後能入港易舟然後能登岸誠有強弓勁努乘高據要以待之可使坐斃也若海船不用其所省當以百萬計矣武學博士朱熹不知鈞慈有以處之否衆人之諾諾不若一士之謭謭也伏乞留念某頃在東南所聞蜀中事今既親見乃知所聞謬誤多矣大理陳少卿既親見又詳審其心公平乞詳細詢之庶得其實蓋有非書所能盡者吳宣撫二月二十一日急召其二子知利州綿州者

既傳其所苦已自安然二子尚未回任也某仰辱下問
輒此縷縷上稟僭易知罪

答李仲信

某蒙恩兼職翰苑尤非所長方力具辭免也示諭益以
愧悚酌古要論舟中得細觀議論宏博筆力雄健欽嘆
無已其間鄙意有所疑者輒具別紙竊謂文章之用不
過敘事與明理而已理中有事事中有理然事必得其
實理必得其正東坡以言語妙天下而制科文字或未

免語焉而不精擇焉而不詳如賈誼一論謂當先交絳灌使其不忌然後舉天下惟吾所欲為安有立談之間遽為人痛哭者賈生痛哭之時則灌已死絳已之國矣此非其實也先交絳灌而實欲取其權此非其正也致使王荊公得以藉口故區區既竊嘆仰又願審處之必蒙照察也其餘三編續奉報

與呂子厚

某方念不獲嗣音伏辱書誨慰荷無量正獻文集等跋

語殊愧不稱昔嘗聞于紫薇舍人以為伊川祭文最能明正獻之心者區區輒述所聞然精微之際未敢謂僅能勿失也垂論過厚尤以悚反忽遽上狀不能逮意尚幸裁照

答蘇仁仲

某竊惟年德之高而經緯本末足以表式斯世言論風旨足以開益後來顧乃僻在一涯超然物外蓋識者所共嘆息才難之患今日尤甚時而出之政恐不免耳丙

辰時議高識卓見者燭照數計三十餘年間效亦彌可
暗矣而談說者云云猶如故況在當時乎聽察之間所
繫大矣益可嘆也示諭改奏文字大抵吏文稍涉疑似
必取決于朝廷不然雖徒決無益蓋例如此此所以不
能專其他曲折有尺書所不能盡者殊為愧悚

與李運使

某山居絕無外事可以一意觀書第目每日甚殊相妨
也又聞頗苦目疾此中年嘗患而應辰特甚耳沈存中

方每日用白湯沃洗勝于服藥不知曾行之否邊報竟
如何目前未見其可恃以無恐者但幸其無他耳仲秉
繳還曾覩詞頭尋趙舍人歸遂行之却不報行也敬夫
中批知袁州次日除鄭藻儀同文潛殊不曉第恐亦難
久也賢良召試辭免文字極得體第恐命再下亦湏一
出耳幸望審處之墾田之議頃于邸報中見之頗訝其
首尾不貫穿今得見全文甚幸垂崖堂記所謂發潛德
之幽光非可為淺見寡文道也大抵實錄乃王欽若主

之如澶淵之役竝不及寇萊公一字而其自辨處甚悉
也永叔原父等文字多奇絕處方欲謀一定居之地盡
裒集所有藏之他時可錄寄也

答劉樞密

垂諭力陳時事非特以退為諫而已尤見所以非苟然
者昔韓忠獻與司馬文正公書云竊聞執事以宗社生
靈為念懇辭樞弼必冀感悟上意大忠大義充塞天地
橫絕古今蓋世人但知溫公辭官之為高而忠獻獨明

其心也比者時事紛紛更見先知之明衆益嘆仰矣某素辱知照尤不勝拳拳之誠屬目眚日甚沃洗數百遍僅能勉強執筆不能詳謹乞賜矜察

答梁子輔

伏蒙垂諭溫建二守曲折竊謂三人夷惠之行不同而孔子皆以仁予之蓋本無私心各行其志不足以相非也三仁固更相為謀使夷惠而同時則亦必以心相知矣如進不隱賢必以其道不以三公易其介又自謂直

道而事人則其和也豈苟同而已哉孔子之于夷惠固無可無不可然而旅泰山伐顓臾則責由求以不能正救蓋有不得已者矣惟發于誠心以敬君愛民為念而不敢有一毫顧恤毀譽計較利害之心以盡人道聽天命可也天下之禍固有養成者亦有激成者西漢張禹孔光之流阿附唯諾專其身謀以至大盜移國而莫之誰何此養成者也東漢之君子必欲與小人立敵終于俱傷兩敗而國隨以亡此激成者也然則為君子者豈

無中道于其間哉伊川先生嘗曰中則正矣正未必中也世蓋有正而未必中者不可以其未得中行而謂之不正也正未必中學者所當玩味此語體究此理以常自省察某愚陋衷情益惴惴然恐不及者乞賜指教幸甚

答尤延之

蒙喻劉陳二公此皆一時宗師尤難措詞頃嘗問呂居仁丈神宗實錄張天祺張橫渠傳殆非尋常文士所能

作呂文云此兩傳皆是范純甫自做他人豈易及此天
祺傳言新法之害當與王安石分受其過橫渠言乃攷
索所至非默識心通今此二公恐亦類此輒以所聞謾
錄呈上舊見范忠宣王正仲曾子開皆云元祐間有朋
黨之論忠宣辨尤力錄歐陽公朋黨論以進忠宣奏議
言行錄皆可攷然竟不知何人為黨論其論指何事也
後得一書曰元祐密疏者有劉器之一章分王安石呂
惠卿蔡確之黨各具姓名于其下方知忠宣所爭者此

也器之盡言集亦不載此章元祐密疏李仁甫曾借去
錄本留史院恐湏載併及忠宣所論于傳未瑩中再作
四明尊堯集為悔過之書以寄器之器之答云神宗未
嘗師安石安石豈足為聖人昔既稱道如此今乃置之
僭逆悖亂之域是非去取有非鄙拙所能曉者然事君
行己苟亦無憾而今而後可以已矣事君行己等語蓋
亦察其心也又有書與楊中立以為不辭一身之有過
願成來者之無過楊答以賢知過之則道不明不行安

能成來者之無過乎因及禹稷顏回事或出或處皆當其可耳瑩中齒長而答書以先生稱揚之復以書辭避瑩中云先生指纓閉以救其惑謂纓冠閉戶龜山及了翁集其書具載可攷也此兩段合載于瑩中傳末視黯無怍欲改作于黯無怍道固如是不由外錄其下欲添兩句云視彼汲直如玉而琢

與方叔興

聞既還蘄春諸況安適大抵學問之道止是揆于心而

安稽于古而合措于事而宜所以體究涵養躬行日用
要以盡此道而已若家務人事以至應舉從仕皆不相
妨叔興用心于內當益有日新之功也賦兩篇甚有工
處然湏廣看前輩諸作取其所長盡為我用方能從容
中節也有問鄭毅夫作賦之法鄭云亦在乎熟之而已
歐陽公言為文湏是看多作多講論多蓋此雖小技亦
湏功力到乃能精爾

與呂伯恭

首夏清和恭惟勉就吉利哀慕未忘百神協相尊候萬
福想臺移趨觀朝廷亦心循例以舊物招致不知何以
處之當豫有定論也伊川文字編次如何向所納去者
有可取否近檢得伊川與富韓公之子書又尹和靖答
十一丈書皆錄呈橫渠集元晦頗以為未盡曾再理會
否集後有溫公帖偶有呂和叔與明道帖正是答溫公
所論今亦同往也敬夫雖不得書而聞所苦良已要湏
止酒為善耳近有以其所論兩樞之章而稱門人題跋

者刻板散布頗亦上聞亦知之否承屏居明招益復省事但書問難通爾



文定集卷十五

欽定四庫全書

集部

文定集卷十六至十八

詳校官起居注主事臣顧宗泰

主事臣呂雲棟覆勘

總校官庶吉士臣倉聖脉

校對官中書臣吳向華

謄錄監生臣吳炳文

欽定四庫全書

文定集卷十六

宋 汪應辰 撰

書

與汪叔嘉

蒙諭書中大旨某何足以知之第昔嘗承師訓今僅能
守而不失者姑以為報所謂歷象五行治水作樂觀象
作服之制尤有提綱振領之道又慮難于致究竊謂天

文地理刑名度數在學者皆當攷究非特為舉業也註疏之中固已詳矣間有不同處如東坡介甫嘗言之亦不過六七處可以參攷若欲極其微妙則古人固有終身知一藝而用之不能無差者若其大槩則不可不知也如此亦無難于攷究矣大抵聖人仰觀俯察制禮作樂皆有至蹟存乎其間不然則是紛紛者贅矣故曰其數可陳也其義難知也昔者孔子觀于蜡而曰仁之至義之盡觀于鄉飲而曰知王道之易易也論郊祀之禮

禘嘗之義而曰治國其猶視諸掌乎吳季札觀簫韶之舞而知帝德之廣大韓宣子見易象春秋知周公之德周之所以王此豈拘著于刑名度數與文字之間哉是以君子博學詳說將以反說約使不知所謂約則所學者特技耳何以為吾儒舜典之命九官與呂刑本不異但註似誤以皇帝為堯王介甫專不取註疏于此乃不能正其失竄三苗命伯益禹稷皆舜事也而以為堯不知何所據也若其命官先後之次此則偶爾不同不必

論也立政所謂九德即臯陶所謂也楊子曰羲進重和
進黎則羲和非重黎也特進之而已先儒所謂重黎司
天地之官羲和四時之官也春夏陽也故進重秋冬陰
也故進黎後世遂以羲和為重黎或謂中庸九經先于
修身而尊賢次之此不應不及修身或謂大學引帝典
曰克明峻德自明也則是自明其德矣此皆不攷帝典
大學之意書稱堯之德自欽明文思以至格于上下其
為修身也至矣故繼以克明峻德此正合乎中庸之叙

若使上文言堯德如此之盛又云克明吾之德其語可謂叢雜至大學益謂堯之所以能明峻德者以其自明也由吾之明德故能明人之德所謂以其昭昭使人昭昭自明二字其所發揮最為有力若使大學之意以明峻德為堯之德則何必更下註脚云云乎此可以意曉也又其所引顧諟天之明命則將何以言之以此而論固灼然矣難壬人之說皆通生于千載之下雖窮其志思安能合乎聖人要其無悖于義理有補于名教使聖

人復起不能易者即經之所在也久去師友之訓常懼棄息輒因來問復爾忉忉更望以所疑時見訂正幸甚幸甚

答毛季中

某侍下幸無他第日益貧耳奉祠且滿矣比作劄子求再任萬一不諳則可索我于枯魚之肆矣不曉事自應得此不敢不安之也承諭為定居臨川之計相望益遠柰何柰何或因歸鄉取道王山切一報我當得一見之

幸沈元用甚欲求識此回經由曾少款否呂丈于吾人
甚眷眷願不惜時與之通問子韶處不通書恐亦未然
幸更思之交游間稍通顯者便與之疎則似有意至于
世之窺伺亦不足恤利害豈人所能為耶某山居卻頗
得讀書然獨學無友離羣索居陷于古人之所病終亦
勤而無功平時師友益日夜在念也今皆在數百里外
書問且不能數況異時蓋簪之樂也以此言之聚散豈
偶然哉平時嘗斐然有志斯世今窮居循省日久百念

已矣但求有以糊口優游卒歲庶為鄉曲一無咎無譽
之人耳尚望時有以振之使遂此志許子理後曾通書
否此間益闇焉不相聞但聞其至湖南首劾帥司數事
使人增氣然竟不行也因便至辰州一問季文如何并
養原亦有一書同往宣城官況大不佳俸不足用差出
每月止一二日在家又職事有非人力所堪辦者如曠
三十里許無人家而責以捕盜之類是也岳侯比赴棘
寺又傳已出不詳所以再遣使介至金國邊鄙其遂少

安乎陳文得書云十一月間欲赴惠州不知今行未來
書具留此渠亦約欲專人來相問也喻文得休致即往
光福居中赴溧水必湏同行彥柔敏中禹錫相繼去世
可為痛惜者范忠宣公赴謫所至中途舟幾覆忠宣墜
水既上笑謂妻孥曰此豈童子厚為之哉消息盈虛之
理固如是也胷中千萬此後不能記憶草草附問遇便
即寄數字以慰寥落至望他惟順時保重以俟天命耳

答徐知止

某伏退蕭寺日以懷念蒸濕欲雨伏惟尊候萬福奉教
極荷此正吾輩幼而學之壯而欲行之不可以不素講
也乃蒙切磋之益幸甚幸甚天下之事常傷于銳而無
漸獎之在人者固不可以不革然使其有忠信誠懇之
心則當究獎之所從來慮其始而及其終行之以漸消
之以晦而持之以久固未有初不攷究但見其于人情
不合率然以為非是不俟終日而盡罷之者美則美矣
然此出于銳氣而非出于誠心者也先甲三日後甲三

日革弊之難如此今人于泛交之間苟見其過猶為之掩覆保全諫之于密况父子君臣之間乎昔章聖皇帝晚年頗崇神仙興土木及仁宗即位以為天書者天所以錫先帝也不當留在人間而納之陵中玉清昭應宮有火灾于是更不修繕以答天戒及章憲明肅上仙首詔中外無得言垂簾時事而事之當革固已消于冥冥之際矣此真萬世法也故元祐間所更法度皆本先帝之意而為之亦以此也如舜誅四凶事堯舜本一道用

四凶非堯之過誅四凶非彰堯之過若使四凶乃是所
信任心腹之臣則舜之去之亦必有道矧堯姑試之以
職事既績用不成則誅之此乃成堯之志何過之彰哉
願更思之匆匆上報苟未合不惜見示亦庶乎朋友講
習之樂也乞倍萬愛重不宣

上趙丞相

鴻

某近嘗拜狀必已上闕省覽孟秋猶熱伏惟純誠鉅德
百神相之鈞候起居萬福得行在書乃聞居興化之命

相公數千里間關而歸謂自此稍得休息而蠹蟲之徒
猶排報不已風波可畏直道難行一至于此然攷之載
籍昔之以元勲盛德而見勝羣小如此類者何可勝數
今日之事不足為異也跋扈所以見周公不容所以見
孔子是殆天意也頃見相識間議者往往以相公慈溪
之居太近某獨謂仁人君子存心行己無愧天地至于
意外之患則雖智者不能豫為之所欲加之罪亦何適
而不可哉相公高識宏度于是非利害之際處之熟矣

伏惟坐照消息怡然順受聞命引道平氣遜辭以避方
熾之鋒有識之士亦將觀相公何以處此也懇切而言
忘其僭易暑氣未艾川路云遠更望倍保釣重以慰中
外之望

答趙允明

前日將如常山途中遇素所使令者乃知車御還自虎
林殊慰久仰方欲為問忽辱近書審承綠戲多暇尊候
萬福某奉祠窮居幸爾如常他無足道長暑相別忽爾

涼冷日月易徂當共惜此暇日庶不虛度也東行所幹
果何如示諭循規矩之說此實要法然當求其放心收
之規矩之中若近世之士胸中營營而姑以糠粃束縛
其形骸又以欺愚不知道者此則非所敢聞也昔嘗與
益謙言士固有終身無過行直至臨死生不亂然而未
可以言道者況其下乎恐吾友求規矩于尺寸之外故
復發此他日舉似益謙當亦以為然矣使行匆匆上問
益加進修追蹤古人是望不宣

答張定夫

蒙頒示舊作四篇至言奧旨皆自得之後學之所未聞幸甚幸甚然其間鄙拙之見猶有不能無疑者敢試言之以求教于執事某聞之聖人之教有小學有大學若周官所謂六藝來書所謂胡安定教人以吏事知兵與水利算數等事者小學也若中庸大學之所謂者大學也學無大小之分小學蓋所以為大學也孔子曰溫故而知新可以為師矣又曰下學上達知我者其天乎使

局于一技而無知新上達之功則不免于藝成而下致遠而泥矣後世學者高談微妙而闇略名數度越繩墨蕩然無所執守枵然不適于用若此者非特不知小學亦非所以為小學也以刑名法術名其家以章句訓詁傳其徒陋而無法博而寡要若此者非特不知大學亦非所以為小學也以此論者學無大小之分知其一則萬事畢否則兩失之矣自秦漢而下至二程先生始能發明微言使學者知本末不二體用一源而聖人之書

始可得而讀其有功于道甚大來教以為荀揚王韓固
非其比此可以為允論也而猶謂其道則是也其教人
者非也竊謂學者學此教者教此而已不應于道之外
又別有以教人也沈濁漸漬渙然冰釋怡然理順則雖
不責之重禁之切而人自歸于善矣彼其詐偽者非也
以此治經以此讀書以此作文何不可之有彼其自處
于卑陋者亦非也胡安定之學晚進不能知其詳抑其
止于此乎或又有所謂知新上達之功乎此則未敢以

輕論也

答葉南美

所謂文潛性論謂性為善惡混固非矣然彼蓋隱之吾心以為誠然而後言者也今之所謂性善者蓋尊信孟子而云耳未必心見其誠然也蓋求所謂見其誠然者乎謂格物為扞格竊恐未安克伐怨欲不行孔子不以為仁此可見矣易頌甚佳則既已超然立言矣而曰欲用此意以學易得非謙損之辭也令似許迂臨甚幸今

遣人馬去然甚愧表率也

答胡明仲

恭以閣學侍郎聞望在人既更闇進退之際而愈高識
與不識孰不慕望矧某受知受教之舊其歸向之心豈
間久近然以僻居山谷人跡罕至之地朝夕焦焦焉饋
粥不給之是謀其勢固不能趨造門下至于咫尺之書
亦坐貧與僻左之故無由時致于前鄉者附便拜書五
年于此矣又不知其果達否也顧事勢齟齬如此與區

區之心大不相類謂且得誅絕之罪于左右矣比者鄉人方刪定附示手誨所以存撫教誨之意不啻疇昔感戢之餘而昔者妄自隱度恐懼私情渙然冰釋幸甚幸甚某間居八年麤穡之味艱難險阻之狀久已甘之斷不敢以此動念惟是學業不見所超使異時幸而得侍未知何以為進見之資耳伏承奉祠既終不復再請蓋祖宗以祠祿為憫勞優賢之異數其子之則曰往滿赴闕故請者有以為詞今使執政侍從之臣而猶家貧仰

金匱要略 卷之二
祿自言茲固大賢之有所不為第恐衆人之所不識則
以為其意安在旁推曲引將無所不至雖君子之行固
不循俗毀譽然固有道雖委蛇而不失為大直者未知
台意以為何如苟有所懷不敢不盡且因以求教也僭
易死罪某竊聞文定先生所與諸賢往還簡牘皆已缺
石願各得一本置之左右閣學侍郎高文偉論其繕寫
者固不敢妄意得之或有墨本儻使得以拜觀不勝厚
幸輒恃眷私之舊遂敢及此仰惟先覺固不倦于教也

今因僧至衡川屬其專持此至門下未即趨侍執筆倍以依仰敢乞順時倍保台重

答徐漢英

比人回奉手誨讀之再三不勝感嘆且承涉冬履候如意少慰瞻仰伏承垂問墓額但恐李公擇事當時傳聞未必得其真而後來記憶容有不盡然者不作墓銘不求挽詩可也似不必揭于墓道挽詩如祭文然為之者所以自道其痛惜長違之意本非求而得者雖今人不

免于求然吾告人曰不求則是失其實矣司馬文正書儀以為墓前立小碑可高二三尺許大書曰某姓某名更不書官此蓋擴中已有志文則墓前只須如此今既無志文則墓額稍為文言似未為過孔子題季子墓曰嗚呼有吳延陵季子之墓此事始也文潞公題廣平先生之墓蓋有自來矣後人多認明道為謚非也但以其人平生行狀而節以一言宜令簡重切當乃可傳信而行遠竊惟先丈承事心地坦夷無所矜忤好士樂善甚

于世人之嗜利可謂長者矣若只云長者徐公之墓則
是妥貼而得其實而有陰德之意亦在其中矣蓋若云
某姓長者則止是稱號若先生府君之類若云長者某
人則二字乃是明其德如明道之類是已漢時稱重其
人多云長者文帝問田叔公知天下長者乎對曰臣何
足以知之上曰公長者宜知之叔頓首曰雲中守孟舒
長者也張釋之間文帝周勃何如人上曰長者又問張
丞相何如人上復曰長者直不疑之徒史稱其長者宣

帝以黃霸治行終長者又問龔遂安得長者之言攷此則長者二字甚重但世人泛泛言之遂不以為重耳君子固當論其實也更有鄙見若只是姓名如溫公書儀則子孫自為也至于稱道德行不免假之于人所謂寓言十九親父不為其子媒非吾罪也人之罪也不知高見以為如何伏惟追慕罔極思所以表見于無窮慎之重之又以下問苟有所見不敢不盡其去取之際更在從長必以為僭也皇恐皇恐加以見聞不多山居無

文字檢閱其有牴牾更得教誨之尤幸輓詩不成語言
謹錄呈公擇事如必欲如此呂逢吉乃李氏甥俟他日
問之而後從事如何更在垂諭

與信州程尚書

伏以比年以來民方幸于息肩而信州又得如尚書者
辱鎮撫之其蒙幸又有加焉而天下靖民橫流肆虐戴
白之老未始見聞恭惟龍學尚書誠心惻怛惟以利民
及物為事方無事時求所以饒裕矜恤之者無所不至

況今遭此鉅異漂蕩墊溺乎遺無幾亡者暴露委食于
烏鵲存者困乏寄命于俄頃鄉下細民所仰食者大則
畎畝而畎畝化為谿汎矣次者菽粟而菽粟混為泥沙
矣富者方挾所有以幸災貧者將無所恃而抵禁是以
良民惴惴私憂過計恐其害不止水而已然而未聞使
州有所賑恤以慰存沒之心為之措畫建久長之利者
竊意屬吏徒欲仰寬夙夜之憂不以實告而如某等輩
雖受恩顧之異而自以杜門閑居又不敢僭易而言之

也伏見隣郡屬縣有程氏數家者皆以財為長雄乃者
漂蕩之餘止留倉庫一所飢民叩門而求之不得于是
嘯呼發所藏而去訴之縣縣不能治也時方聞之固已
憂鄰境有倣而為之者矣茲又聞上饒縣石人鄉有李
氏者閉籬以待賈民持錢造門而不答則恐之曰必不
得將自發廩李氏懼而受之某鄉有某氏者欲增價以
糶民與之商確移時不決有數人遠來者不復計所直
而從之其不從者患其不與己同也湏其出而奪之某

間居不能盡知外事所聞止此二者而已然所以未至如旁郡之甚者蓋有憚于尚書之威重也而某氏之事憩之縣縣亦不能治蓋往往烏合之人莫知主名雖欲治之不可得已竊恐小民日迫于死亡之憂不復顧慮然後什伍為曹鄉閭既無如之何官司又不得而治必有甚于今者矣所謂其害將不止于水者也伏望使州察此事理早賜措畫度當今可行之宜求古人救災之政每縣專擇明察慈惠之吏委之奉行其有便宜許其

以法條陳要使上下之情通則民必被其實惠通變于
不得不為之時消患于無聲無形之內不勝幸甚若只
作尋常文字泛泛行下實恐徒為文具而無益也又聞
民以災傷赴愬者甚衆雖未聞指揮竊計使州必且次
第施行伏見庚申歲大水為害當時按視蠲租德惠甚
渥民間不免有所賠費逮既蠲放之後縣中乃令放米
及一石者出錢買務酒一石置酒之直足以輸租而
向之賠費又在外矣朝廷虛失常賦而民間初不被惠

甚可惜也若非豫行約束曾不若不蠲減之為愈也至于受納之際或非其人往往加倍概量以足入倉之數餘者例印虛鈔今使某戶合納米二石以災傷蠲其半所使受納非其人則所謂二石米者未嘗蠲也夫以百姓之財共公上之用于艱難之際宜若于義未為害也而朝廷猶且有所不忍屈己修睦使民休息以公上之所不忍取者乃舉而納之汙吏之家甚可嘆也亦望他日特行約束以警貪狡之心少紓痼瘵之力其他事之

纖悉有非所能盡知尚書周爰諮詢必有能言之者矣
古人有言曰剪爪宜及膚割髮宜及體髮膚尚無足愛
況其他乎又曰救人之難飢不及殯飢渴飲食猶在所
緩則事之所急孰有先于此者乎某不在其位而僭易
言之可謂罪矣然思古人救災之意如此其切況食奉
祠無功之祿辱門下異常之眷而坐視民病如此而以
避嫌纖默自處可謂有愧于心矣伏惟尚書以邦本國
體為心唯恐有所不聞亦必不以僭易賜罪也然而今

特已然之害如此陰陽隔屏理有常數夏潦秋旱自古
所記今之田畝十存一二使又有他日之憂則民病何
時而已脩庶政以召和氣罄誠意以祈多福以弭禍于
未形而起福于將來想已在台念久矣不待芻蕘之言
也干冒台重下情不勝戰慄之至

答張侍郎

比人回領賜教不勝感慰初雖聞駐節清口繼又聞已
奏乞歸鹽官固知清口必非久但區區之意以謂湏取

道城中而歸庶幾得遂瞻侍以慰釋十有五年去德之
思且所欲面稟者亦非一二故前日專人拜書已俟詳
報今乃云廿四日取徑路去而某廿六日始奉教已入
蘭溪界矣參差如此悵怏何已某欲去之計前此屢以
稟知不惟才力短拙無補于事其間曲折甚多又以老
母前此隨家兄在黃州一別七年今年七十有七矣近
方正母子之名前此雖有欲養之心將以誰告今身在
省闔可以言而不言復何待乎七月未嘗欲乞嘉禾偶

有都司之命遂復遞勉十月初四明有闕徧見諸府以
情告諸公皆謂進用在即而乃求補外豈有所疑乎終
不見察左府云少待結果了去亦未晚某云豈敢有此
望正使誤蒙朝廷除擢却恐去計愈難矣時節因緣未
有易于今日者未幾四明除人適辛企李赴召除春官
遂以東陽為請諸公初相留之意甚勤既而見其決去
亦頗不樂然某以是日輪對先生以是日得官祠又十
日而有東陽之除好事者不知本末以為與永嘉相表

裏至有死黨之說又以謂面對不合騰播百端惟是廟堂諸公備知曲折有間焉亦以告之故久乃稍定子集所報得于傳聞亦不無所自也某上殿所論以謂祖宗時治獄則有開封府御史臺又置糾察刑獄司斷獄則有大理寺刑部又置審刑院自元豐改官制大理寺兼治獄事然猶置少卿兩員一以治獄一以斷刑今則止置少卿一員治獄斷刑皆出于一然則獄之有當平反者當責之誰乎又如祖宗時雖有刑部大理與審刑院

然每至赦宥必別置詳定罪犯一司以侍從館閣領之刑部大理審刑皆無預焉蓋所謂罪犯者議法之初皆更其手今若又使之詳定誰肯自以為非乎至于梓益變利去朝廷遠每赦則委轉運鈐轄司詳定而不委提刑亦此意也今刑部昔之議法今之詳定皆出一乎其能使民不寃乎只如故相用事鍛鍊文致皆韓仲通為之今又使仲通改正豈復有是理況又因星變降詔許民庶言事而事干刑部戶部者復送本部然則戶部之

有枉謬誰敢以為言乎是時韓已去矣上大稱賞以為
切當許以即當施行時已有大理少卿楊揆一員矣又
除司農少卿陳章為大理少卿專治獄某又言近降指
揮治贓吏盡用祖宗法今時與國初不同國初承五代
殺伐之餘嚴刑峻法未能盡革當時州郡多付之武夫
至有不識字畫而以僕從代書判者至于判司簿尉往
往以牙校為之故朝廷亦不復以士類待之至于天下
既定選舉益清前日之刑寢不復用故范祖禹著唐鑑

以為士自一命以上刑辱不及以為本朝美事然臣之愚非以贓吏為可恤也彼既已冒犯典憲自絕士類亦何足以士類待之第恐此刑既用久而濫及于士類爾不必遠引只如前日用事之臣意所不樂者往往皆誣以贓罪今之大臣有親被其害者陛下聖明今已灼見誣枉若使當時盡用祖宗法治之今雖欲改正而復用之豈可得乎此不可以不慎也上云卿所慮甚高遠人所莫及然朕當擇巨蠹者治之以儆其餘宣諭之語甚

多今錄其要者某云臣謂贓吏皆當治但此刑不可輕用爾若使監司得其人按治得其實雖停降編竄亦足以懲惡非謂縱姦而不問也上云卿所論甚善當日所對大畧如此同舍有聞之者從而緣飾撰造欲相中傷然面對之事主上所知乞出之事寧執所知皆有本末彼亦徒為紛紛爾恐先生欲知其然故此布稟東陽初以贓財足用故請今乃不如所聞未知所以為計所示文字謹當一一遵奉別有委令亦乞不鄙

與劉樞密

某屏居蕭寺衰悴多病目昏脚弱日以增劇未知竟如何也元晦改秩奉祠聞必欲力辭決非苟然者矣敬夫兄數相見通來士人頗知為己之學實二公倡之為多斯道為不墜矣劉憲來自臨安近事頗能詳言之可以得其大概某目昏甚執筆艱苦勉強拜狀不能詳謹併乞矜察

上陳丞相

惟是賣鹽一事頃歲承乏見帥司財用窘迫殊甚嘗謀于鄭少嘉朱元晦陳季若惟元晦以謂寧可作窮知州不可與民爭利而少嘉季若則以為可故于三人中從二人之言止是行于城中間有犯者不過量行笞罰雖杖罪亦絕少時有不相樂者言于廟堂以謂福唐禁鹽徒流無虛日又有民在塗炭之語省部行下嘗具申朝廷乞委官體究若果如言者之說乞重行黜罰朝廷知其無他止行下照會而已然聞後來併外邑亦皆分賣

地頭既廣刑罰頗峻每切追悔前日之舉殆亦作法于涼者也竊聞僕射相公寬平簡易民自不犯非復前日紛擾之弊皆暗消于冥冥之中竊謂嘗如今日可也後之來者人各有心未必能一遵約束則紛擾之害或更甚矣君子之政當為斯民無窮之慮

與喻居中

朱元晦以召命再下諸公迫之方行既對力排和議其他皆人所難言者得武學博士待四年闕然其家貧母

老勢湏再請獻祠也葉幹頗有望于丞相得申言之良幸

與呂居仁舍人

某平日未嘗學春秋比因攷究諸家之說竊謂願讀春秋必先明聖人所以制作之意苟于宗旨有所未明雖有得于片言隻字之間終無益也因有疑曰中庸曰非天子不議禮不制度不考文又曰雖有其德苟無其位不敢作禮樂焉雖有其位苟無其德亦不敢作禮樂焉

然而作春秋者何也今胡氏之說曰中庸誠有是言也不曰春秋天子之事乎止以一言蔽之而不辯何以作春秋終不足以祛方來之惑既曰不可矣不敢矣又從而為天子之事則聖人之言行鑑矣或曰春秋非有所褒貶特託行事以明王道而已故曰天子之事夫如是則六經皆明王道也而獨于春秋曰知我者其惟春秋罪我者其惟春秋何也吳楚之若爵則公也僭則王也而春秋書曰子此其彰明者不得謂之無所褒貶也賞

罰不出于時王而聖人自為之可乎此所甚不曉營營于中而未知所決者敢望不倦指教幸甚幸甚至于所謂以夏時冠月以周正紀事極為牴牾周人雖建子必不以十一月為冬正月使其以為冬則是用夏時矣今孔子雖用周正而以十一月為春乃與夏時相悖安得謂之行夏之時乎其說春正月無冰曰今在仲冬之月燠而無冰是以周正月為仲冬矣至其說冬大無麥禾則曰麥熟于夏禾成在秋而書于冬者有司計歲入之

多寡然後知倉廩之竭也夫正朔可改而天時一定今所書冬者以為夏時之冬即則是聖人所用正朔前後自相乖戾以為周時即則麥不熟于夏禾不成于秋而冬乃納禾稼滌場圃之時矣不知何以抵牾至此因書及之併乞知察亦以見立言之難也無由倚坐以請所疑臨書不勝拳拳

與呂逢吉

比辱回翰不勝感刻水潦為害父老皆云未之見聞城

中特甚想不無遷徙之勞山居幸而人與屋舍皆無恙
數畝之田皆為沮洳矣人情嗷嗷所不忍見若鄰境又
不止此也魏侍郎之女嫁趙氏者壓死于昭慶寺至今
尋其遺體不見前日雨後因揮鉏之際又陷二十餘人
于藏下可嘆可嘆每為鄰里言雖歲事失望然視他處
已為樂土矣不審比辰起居何似伏為萬福也家叔既
至城適事已結斷竟不赴公庭而歸荷賜非淺五馬得
無疑其不來耶果爾更得略說及乃荷示諭子由所作

東坡墓誌昔見陳齊之云嘗見龜山楊文言及龜山云
他只是要道我不是元祐人可謂誤用其心所言三段
此固害理而其最不可以示後者如云因經筵言時事
大臣不悅風言者攻公當時大臣蓋呂微仲劉莘老也
而以為與臺諫交通豈非誣罔惇卞輩政以此罪微仲
諸公天下後世固不之信而子由乃當時執政遂助實
其事何以使小人無詞耶然觀其作潁濱遺老傳邪正
分明略無回隱有不可誣者蓋傳將付之子孫而誌銘

刻之石意者恃曲筆以避羣小之鋒然孰不作之為
愈耶歐陽公作濮議謂范堯夫傅欽之呂獻可趙大觀
皆誣謗英宗以取直名其後章惇以此書納之禁中使
歐陽公有知當悔怍于地下矣以此文字不可不慎也
林旦事固如來教當時攻之者太過嘗謂元祐諸公忠
直有餘而識見不足不知高見以為如何不敢不盡也

又

某連奉手誨仰荷君子眷眷不忘之意非言可謝雨餘

微涼審承侍外尊候萬福感慰之至某冒暑至此得雨
幸有生意來日可離此因求一見之幸豫以為喜也安
石邪說一至于此今其效彌可睹矣而學者尚未知其
然自新制專尚經術四方不知朝廷之意遂謂欲復用
安石之學六經新義其價倍貴甚可嘆也忠宣公決無
他意如平章之言似亦太過但其持論專欲消合黨類
兼收並用而不知其勢亦有未易為者以僕觀之君子
小人之勢決無兩立元祐晚年呂微仲逐去劉莘老門

下士而引李清臣鄧溫伯蒲宗孟于從班忠宣公兼收
並用之說略施行矣然出而首倡紹述之說者李鄧也
其流害以迄于今亦可見矣曾子開謂使范公之言行
于元祐之時必無紹聖大臣報復之禍然使蔡確不殛
死他日復出為惡當不下惇下但不當以詩罪之耳雖
不殛蔡確以開後例章惇得志亦肯輕恕諸人乎惇下
在元祐間或偃息大郡或優游奉祠所以貸之者厚矣
略無懷惠悔過之意則知專以優柔待小人者恐非其

理也若謂忠宣公有他意此則不可其再相力辯臺諫
誣罔吐剛茹柔其罷相後又乞寬元祐黨人之罪以至
得謫是果何求哉願更慎言之韓富二公讜論真藥石
也劉道原蘇子由皆疑周官子由以為非周公之全書
則可而道原詆之過矣自孟子時固已言諸侯惡其害
已皆去其籍矣則後世所傳或非全書但在慎擇之耳
不可盡廢以為不然也是以道力闢王安石因安石之
尊孟子也併孟子而非之不亦過乎歐陽公謂繫辭非

孔子所作前輩多以為不然韓魏公未嘗與之言蓋護其短也區區所見如此更湏面盡人行借紙筆具此作報未間自愛不宣

又

為別近爾已若數月窮山兀坐惟有思鄉秋氣益清伏惟汲古涵養神相尊候萬福某以前此塗中觸熱日不免飲冷初第覺其快耳歸來乃大病終多吐清不能更進飲食兩日來稍有生意所謂快心事過必為傷爽口

物多終作毒良可以為戒也所欲明道集了翁集並納去溫公日記如錄畢亦願一見聞宣城守別除人不知何故其詳并有他聞皆願聞之許子履毛季中兩書輒納上因便敢煩指揮附行方耕道之弟欲往泉南想湏到廣教求書某亦欲作潮陽書他日再當奉浼也王安石邪說既已灼見其非不必多辯東漢之君子節義凜然視死如歸固非後世所能及然更當思聖人過猶不及之訓復于中道可也蓋自黨論一興賢人君子無噍

類而當世之士始知其不可往往俛首巖谷結舌時事
董卓之暴有甚于梁冀王甫曹節侯覽宜士君子所切
齒也然以黃琬楊彪朝之宿望與之同列而不愧苟爽
陳紀韓融時之名士受其聘召而不辭蓋有意于保身
而濟事矣申屠蟠于衆人互相標置之時則遠引而不
言及爽等相繼而起蟠又固守而不出前不陷于黨禍
後不汙于賊臣可謂卓然數君子之間矣不知左右以
謂如何有以倣發遇蒙者時得聞一二幸甚

又

比人回奉教不勝感刻赫日可畏伏惟招提清勝尊候
萬福某碌碌自守幸無其他猶恨未知請見之期爾每
得來問不見鄙棄所講繹者莫非前言往行之要幸甚
幸甚邦直元符以後事某初無所攷益意其如此耳其
後思之不當如此易言之辱示諭當更加詳焉右丞之
功焯然與日月爭光此固無可議者但許公事因涑水
之言人往往信知某頃嘗與知識議及以為未論其他

世之稍識利害者亦不肯為況許公乎然終不知其詳
聞之記聞之書乃西京一守陵闈官所傳蓋溫公嘗囑
其子孫以勿傳也則其所由來固可疑矣又如記趙中
令雖報復私怨而不害其為功業豈不啓姦臣恃功而
無忌憚之心乎昔嘗見胡德輝言溫公日記極有可疑
如記富鄭公惑一尼之言至願得為蛆蟲食其不潔富
公雖所見不同何至此乎而溫公平日最推重富公其
他如文韓皆不能無譏不應如此記事德輝亦意必後

來所增加益當時王介甫嘗奏富弼無見識惑一妖尼之言則德輝所謂後來所增加者安知其不然乎耕道見屬二齋記學問膚淺妄敢率爾他日自當求教也前日所拜煩附去書一乞指揮早達之為幸

文定集卷十六